

## PAVORO ITSIRINKAKENERIRA TITO

---

### Ikamantakerira kametikya inake

**1** <sup>1</sup>¿Añovi notomi Tito kametikyarika pinake? Narori añona aka kametikya nonake. Naro nanti iromperane Tasorintsi, aikiro nanti iritigankane Jesokirishito. Irirori itigankakena nonkematsatagaigakerira maganiro ikogakagaigakerira Tasorintsi inkematsaigakerira kameti irogotasanoigakeroniri Niagantsisanorira akematsaigirira. <sup>2</sup>Aikiro irogotasanoigakera iriaigakera maganiro kematsaigatsirira intimasanoigakera Tasorintsiku gara ineaigairo igamane. Yogari Tasorintsi tera intosegumatempa. Pairani tekyanekara ontimumagete ikantake gara ineaigairo igamane maganiro tyanirika kematsaigakerine Kirishito, inkantakani intimai-gake iriroku. <sup>3</sup>Maikari maika atake aganaka kutagiteri irogotantaigakemparorira maganiro Iriniane Tasorintsi Gavisakoigakairira. Irerotari itigankantakenarira nonkenkitsatakotakerira Jesokirishito nonkamantaigakerira maganiro.

<sup>4</sup>Tito, virori vinti notomisanorira, nantitari kematsatagakempi. Vinti napigematsatene, pitentagakenatari akematsaigakerira Jesokirishito. Noniaventakempi inkavintsavaveigakempira Apa Tasorintsi intiri Jesokirishito Gavisakoigakairira intimakagagakempira kameti ganiri tatoita povankinaventumataa.

### Yantavagetakera Tito Keretaku

<sup>5</sup>Antari nokanakempira kara Keretaku nokantanakempi pagatagetaerora magatiro tekyarira agatageigero, aikiro nokantanakempi tyarika kara yapatoitaiga apigematsaegine pinkogaigakenerira sentaigiririra pinkañotagasanotakemparora nokantanakempirira. <sup>6</sup>Yogari sentaigiririra kematsaigatsirira inkantakanira inegintetasanovagetanakempa ineenkaniniri itimagantsivagetake kameti. Gara ikogi pashini tsinane, intaganityo impanirotake yagakerira. Yogari itomiegi inkematsatanovageigakerira Kirishito inegintetasanovageigakempara, aikiro irogoigakerira iriri gara ipugatsaigari. <sup>7</sup>Yogari sentaigiririra kematsaigatsirira intitari piriniventirorira magatiro ikogagetirira Tasorintsi, irerotari nokantantakarira inkantakanira inegintetasanovagetanakempa. Gara yaventakovageta, gara ikatsimati, gara ishinkisevageta, aikiro gara yagashitantavageta. Gara yamatavinai-giri itovaire iragakera koriki. <sup>8</sup>Kametikya iragaigavakeri iroviriniigavakerira irapigematsaegine pokaigankitsirira ivankoku. Irishineventakemparora kametiripage, ishintsitashitakerora magatiro terora onkametite. Inkavintsajaigakerira itovaire, aikiro inkematsatanotakerira Tasorintsi, ontiri aikiro ineanontasanotakempara kameti inegintetasanovagetakempiniri. <sup>9</sup>Yogari

sentaigiririra kematsaigatsirira gara yogagumatiro Iriniane Tasorintsi onti isuresanotakemparo kameti iragavea-keniri irogotagaigakerira pashini, aikiro iragaveakeniri irogemisantaigakerira maganiro gagaigiririra Niagantsisanorira.

<sup>10</sup>Aiñotari tovaini pugatsatantavageigacharira, onti iniashiigakaro kogapage yamatavitantaigakera. Irirosanoegityo kañoigankicha maika kantaigatsirira maganiro kematsaigatsirira kametitake intsatagaigakerora itsirinkakotanakerira Moiseshi. <sup>11</sup>Yogaegi kañoigankicharira maika pinkanomaasanoigakerira ganiri imaigairo aikiro, onti yoverajaiganakeri maganiro matsigenkaegi ikonogagarantaigaka yapakuakagaigakeri ikematsaigavetarira imaiganakero itsinaneegite intiegiri aikiro itomiegi. Aikiro onti yogotagantaiganake terira onkamentite ikogaigakera iragantaigakemparora koriki.

<sup>12</sup>Pairani itimake kamantantatsirira Keretakunirira. Irirori iniakoigakeri itovaireegi ikanti: “Maganiro Keretaku-nirira intiegi matagavageigacharira, tera intsarogakagantaigempa kañoigamataka matsontsori. Aikiro tera irantavageige, onti ipiriniventaigi isekataigara.”

<sup>13</sup>Ikantasanotakeniroro. Irorotari nokantantakempirira kanomaasanoigeri yogaegi kañoigankicharira maika kameti inkematsatasanoiganakeriniri Kirishito <sup>14</sup>ganigeniri ikemisantaigairi jorioegi kenkitsavageigatsirira kogapage. Aikiro pinkantaigakerira gara ikemisantaigiri yogotagaigirira pashini terira inkogaige inkematsaigakerora Niagantsisanorira. <sup>15</sup>Yogaegiri kematsaigiririra Tasorintsi isaankaigakerira ikañovageigakara yogoigake kametitake ogetakenkanira posantepage teranika onkitsitinkante, kantankicha yogaegiri terira irisaankaigeri Tasorintsi ikañova-

geigakara ikantaigake okitsitinkanti posantepage, teranika irogoige tatoita kametitankitsi aikiro tatoita terira onkamentite, isuregisevageigakarotari terira onkamentite. <sup>16</sup>Iriroegi ikantaigavetakaty yogoigiri Tasorintsi tyara ikanta, kantankicha ogotunkani teraty arisano irogoigeri, tera irovetsikumaigenika ikogagetakerira irirori onti ipugatsanavageigakari, neroty teraty irishinetumaigempari Tasorintsi onti ikisaigakeri. Teraty iragaveimaige irovetsikaigakera kametiripage.

#### **Tyara ankantaigakempa antimagantsivageigakera kameti**

**2** <sup>1</sup>Viro, Tito, maika nokogake nonkantakempira antari pogotagan-takera pimpampiatasanotanakerora Niagantsisanorira. <sup>2</sup>Yogari antarivageiganaatsirira intsatagaigakerora iriniane, ishintsitashiigakerora magatiro terira onkamentite, irishineventaigakemparora kametiripage, inkematsatasanoigakerira Jesokirishito, intasanotantaigakempara, iratsipereakovageigakempara gara ikisavageiga.

<sup>3</sup>Ario onkañoigakempa antarovageiganaatsirira pinkantaigakerora onegintevageigakempara, aikiro gara oniashivageigaro kogapage ontiri aikiro gara oshinkiiga. Onti onkañoigakempa maika <sup>4</sup>kameti agaveaigakeri ogotagaigakerora apitsinaneegitene tekyasanorira antarovageige ontasanoigakemparira ojime intiegiri aikiro otomiegi. <sup>5</sup>Aikiro ogotagaigakerora osurevageigakemparora kametiripage, onegintetasanovageigakempara, oneginteigakerora ovanko, onkavintsaantavageigakera ontiri aikiro onkematsavageigakerira ojime. Nokantantakempirira maika onti ganiri osamatsanatanagani Iriniane Tasorintsi.

<sup>6</sup>Ario pinkañoigakeri tekyasanorira irantarivageige pinkantaigakerira

ishintsitashiigakerora magatiro terira onkametite. <sup>7</sup>Pintsatagetakerora nokantagetakempirira ineaigakempiniri onti pinegintetasanovagetaka. Pogotagaigakeririka pinkatinkatagasanotanakerora Iriniane Tasorintsi <sup>8</sup>garaty pogagumatiro kameti impashiventaiganakempaniri kisantaigatsirira ineaigakera onti iniashivageigakaro kogapage.

<sup>9</sup>Pinkantaigakerira yonampigetagaririra insatagaigakerora ikantaigakeririra shintaigaririra kameti irogishineigakeriniri, gara onti ipugatsanaigari.

<sup>10</sup>Aikiro gara ikoshinanaigiri, onti inkematsatasanoigakeri kameti ineaigakeniri maganiro okametivagetiratyo Iriniane Tasorintsi Gavisakoigakairira.

<sup>11</sup>Yogari Tasorintsi onti ikavintaavaigeigakeri maganiro matsigenkaegi kameti irogavisaakoigakeriniri ganiri ineaigairo igamane. <sup>12</sup>Irorotari agotantaigakarira kametitake ampakuuiganakerora avetsikagisevageigirora posantepage terira onkametite ganigera akañoigaari terira inkematsaige suregisvageigarorira posantepage, onti agoiganake ashintsitashiigakerora magatiro terira onkametite, antsatagai-gakerora anianeegi, omirinkara ankematsatanovageigakeri Tasorintsi.

<sup>13</sup>Aroegi ariompaty anegintetasanovageiganakempari agiaigakera agapaa-kempara kutagiteri impigantaatemparira Jesokirishito Gavisakoigakairira irishimpokirerenkapaakera. Irirori intitari Tasorintsisanorira gaveavagetatsirira. <sup>14</sup>Aroegi avetsikagisevageigave-takaty posantepage terira onkametite kantankicha impo ikamaventaigakai yogavisaakoigakaira yapakuakagaigakaira yashintaigavetakaira kamagarini, aikiro isaankasanoigakai kameti irirokyaniri shintasanoigakaene ampiriniventasanoiganakeroniri avetsikaigakera magatiro kametiripage.

<sup>15</sup>Irorotari oka pogotagantakerira pishintsitagantakera, aikiro pinkano-maantakera virotari ikogakagake Tasorintsi pisentaigakerira kematsaigatsirira timaigatsirira kara.

### Tyara inkantakempa kematsatsirira

**3** <sup>1</sup>Nokogake pinkantaigakerira maganiro kematsaigatsirira inkematsavageigakerira igoveenkariegie intiegiri aikiro itinkamipage gara ipugatsanaigari, onti irishineigakempa irovetsikaigakera tatarika ikogaigakerira. <sup>2</sup>Gara iniashitantavageiga, iratsipe-reakovageigakempara, gara ikisantava-geigi, aikiro inkavintsajaigakerira maganiro matsigenkaegi.

<sup>3</sup>Karanki tera agotumaige asureigempara neroty tera tyani ankematsaige. Akiro matavinaigaacha neroty onti apiriniventavageigi posantepage terira onkametite, akisumanaigakeri atovaireegi. Aikiro ikisaitakairika oga akenaiage akisanatavakagaiganaka. <sup>4-5</sup>Kantankicha impogini agakara kutagiteri ikavintsajaigakerira Tasorintsi maganiro matsigenkaegi imaigakai aroegi yogavisaakoigakai, intitari Gavisakoigakairira. Tera iroro irogavisaakoviigajae ineaigakaira anegintevageigakara, ontityo itsarogakagaigakaira, irorotari yogavisaakotantaigakairira. Antari isaankaigakaira akañovageigara onti onkantakera atake akantatigaiganaka kañomataka akyaanirikatyo mechoigaatsi, intitari kantatigaikagaigakai Isure timasurentaigakairira. <sup>6</sup>Aventaigakaritari Jesokirishito Gavisakoigakairira, neroty itigankantakaririra Tasorintsi Isure intimasurentaigakaera iragaveakagasnovageigakaera. <sup>7</sup>Ario ikañoigakai maika Tasorintsi ikavintsajaigakaira ineaigakaeniri kañomataka tenirikatyo ankañovageigempa. Maikari maika onti

agiasanoigake antentaigakemparira enoku ganiri aneaigairo agamane.

<sup>8</sup>Magatiro oka nokantaigakempirira onti arisanorira. Maika nokogake pogotaga-sanoigakerira maganiro kematsaigatsirira impiriniventasanoiganakerora irovetsikaigakera magatiro kametiripage, pairotari avisake okametitakera, aikiro irorotari mutakoigiririra maganiro.

**Tyara inkantakempa Tito  
inkanomajaigakerira vetsikageigatsirira  
terira onkametite**

<sup>9</sup>Maika nonkantakempi gara pitentagari pashini piniavakagaigakempara kogapage piniakoigakerora tatarikara oita terira iroro arisanorira, aikiro gara pitentaigari piriniventavageigirorira ikenkiaigirora ivairopage yashikiiganakeririra intiegiri aikiro kisavakagaventaigarorira itsirinkakotanakerira Moiseshi. Tyampa ankantaigakero kañopagerira oka ipiriniventavageigirira iriroegi, teranika iroro ganiantatsine.

<sup>10</sup>Ariorika intimake niashivagetakemparonerira kogapage ovashi iroro onkenantakempa inkisavakagaigakempara kematsaigatsirira pinkanomaakerityo. Garika ikematsatimpi pimataerityo aikiro. Impo irimataerorika aikiro gara ikematsatimpi pinkantavitakeri gara

ikiyai papatoitaigara. <sup>11</sup>Pineaketari onti yapakuanairo Niagantsisanorira tenigera inkematsataero, ikiiro kañotagantaachane, ontitari yovetsikake terira onkametite.

**Ikamantaganairira**

<sup>12</sup>Impogini nontigankakeririka Aretemashi intirika Tikiko viroku kara pintsatimatanakera piatakera Nikopori-shiku. Ariotari noatakeri anta nontimuntevagetakera kigonkero avisanaera katsinkagiteri. <sup>13</sup>Pinegintetasanoigavakerira Senashi niaventantatsirira joeseku, intiri Aporoshi pimpaigavakerira tatapagerika inkogakogeigakempa ganiri itsonkatakoiganaka avotsiku. <sup>14</sup>Pinkantaigakerira apigematsaegine impiriniventaiganakerora irovetsikaigakera magatiro kametiripage, aikiro inkavintsaavageigakerira kogakoigankicharira kameti irogameiganakempaniri irimutakotantavageigera.

<sup>15</sup>Maganiro tentaigakenarira aka ikogaigake pinkemakoigakerira aiño isureigakempi. Pinkamantaigakerira maganiro apigematsaegine aiñoegina aka nosureigakari.

Maika nokogake inkavintsaavageigakempira Tasorintsi maganiro viroegi. *Maika intagati, Pavoro*